

Furriadura in sardu de su contu 'IS MAZZAMURREDDUS', chi ndi bessit de is pàginas corantacuàturu e corantacincu (pp. 44-45) de su liburu de MARCO PLACENTINO, "*Soleminis. Leggende e misteri. Contus de forredda*", Dolianova, Edizioni Grafica del Parteolla 2017.

'IS MATZAMURREDDUS'

A Solèminis nci est genti meda chi finas a imoi tenit arregordu mannu de is contus de is chi nant "*is matzamurreddus*". Praxant chi siant comenti a duendus o dimonieddus, funt bascitededdu e chini nci arrennescit a ddus biri est scioberau diaderus de sa sorti.

Podint èssiri de duas arratzas: o de coru bonu o de intrànnias malas.

Is matzamurreddus de intrànnias malas si amostant galanus a is pipius, e circant, cun sa gràzia insoru, de ddus spongiai e, a parti de agoa, ddus aciapant e ddus trascinant in is padentis.

Is matzamurreddus de coru bonu, invècias, agiudant a chini est de ànimu nidu e chi, a s'acabu, nci dda fait a ddus biri. Si amostant pruschetotu a is pipius, a bortas puru a is famìllias. Bivint in is padentis, perou chi calincunu tentat de ddus circai no si-nci faint agatai e issus etotu scioberant a chini si depint amostai. Est a su noti, su prus, chi andant in is domus, smìnciant de is fentanas, de asuta is ennas e in dònna sperradura, po ndi scioberai e castigai is pipius malixeddus e agrandiai is pipius bonus.

A Solèminis biviati una famìllia poburitedda, e s'aprètziau su prus mannu de donniunu fiat ca no lastimànt sa poboresa insoru, circant de campai a sa mellus, papendi su chi arrennesciant a ndi scrufulliai. Fiat genti de coru bonu diaderus, po nudda fengiosa e oghiana contras a chini fiat arricu. Is *matzamurreddus* iant apretziau sa bonesa insoru, ca diaderus fiat foras de s'ordinàriu. Una dii unu de is fillus de custa famìllia fiat gioghitendi in su sartu, candu unu matzamurreddu si-nci fiat afaciau apalas de una mata. Su pipiu fiat abarrau spantau de cantu fiat ermosu de bisura, e duncas no si fiat fuiu. Su matzamurreddu ddi iat nau de torrai a nai a su babu e sa mama chi si fessint fatus agatai sa dii etotu, a sa mesanoti, acanta de su pilastru cun d-una cruxi apitzus, a sa bessida de sa bidde. Custu babu e custa mama, sciendi ca no ddui fiat nudda de perdi, iant bòfiu crei a su fillu e iant ditzèdiu de andai a su logu. Lòmpius ingunis, spachendi sa mesanoti, si fiant agataus ananti de una pariga de matzamurreddus cun unus cantu strexus prenu de cosa de papai. Is matzamurreddus, foras de fueddai, ddis iant intregaus su papai e po cussa famìllia fiat stètia una gràzia manna, ca diaici si-nci ddas ant pòtzias bogai is pinnigas de brenti. Candu su bentu no sulàt a favori insoru, ca nimancu unu spitzulu de pani teniant, unu matzamurreddu si-nci amostàt a unu de is fillus narendi-ddu pròpiu innui su babu e sa mama si-nci depiant fai agatai po anca arriciri su papai. Medas àteras famìllias, chi iant tentu sa pròpiu bona sorti, apustis de èssiri arriciru su papai, iant circau de impiocai is matzamurreddus,

amandronendi-sì chi nimancu traballànt prus, abetendi chi is matzamurreddus ddis agiudessint...
s'agiudu, perou, no ddu iant prus tentu. //